

2 San Juan

Gajiräre were gojañumi Ñu. Jesu yare, diaye mahiri säre wereñumi

¹⁻²Yũhũ buɣu mũre Goãmũ beyedigore mũ porã säre ipũre gojabeoa. Jesucristo yare diaye majare opaa mari. Iri mari mera árĩniguicãroca. Eropigu diaye ta mahia yũhũ mũare. Yũ dihta mahibea mũare. Gajirã Jesu yare masirã sã diaye ta mũare mahima. ³Goãmũ mari Pagu, Jesucristo igũ magu mera diaye igũ mahiri mera marire õaro iigucumi. Eropigu marire mojomoro iagucumi. Eropigu marire õaro árĩcũ iigucumi igũ.

⁴Mari Pagu marire igũ dorediro dopa ta mũ porã yujurãyeri igũ yare õaro yũhrirã árĩcũ peebu. Eropã peegu mucubiriabu. ⁵Eropigu, acawerego, mari mera majaräre mahi umupeodorea marire. Yũ doreri mama doreriñe árĩbeaa. Iri doreriñe marire mata árĩtuhaya. ⁶Eropirã Goãmũ dorerire iipehorã mari igũre mahia. Eropiro iri doreriñe ãhraa mũa negohrare peerañe. Gajiräre eropa mahiniguicãrã árĩque.

Bajarã ɣuyaricũrã árĩrãcoma, arĩ werera ãhraa

⁷Bajarã ɣuyarã i mũmũ majaräre buherã wahama. “Jesucristo i yebaguere aridigu masu dũpu gohra árĩgu aribiriñumi,” arĩma. Erã ɣuyarã Cristore ãhaturigu iro dopa ta iima. ⁸Eropirã õaro pee masique mũa. Mũare ɣuyaräre peebiricãque Goãmũ mũare igũ õaro iiburire cóari arĩrã. Eräre peebiricũ Goãmũ mũa õari iira waja obeogucumi mũare.

⁹Árĩpehrerã Jesucristo buherire peenirã irire cóarã Goãmũ yarã árĩbeama pare. Jesucristo buherire õaro peenũrũrũpũ Goãmũ mari Pagu yarã ãhrima. Goãmũ magu Jesucristo yarã sã ãhrima. ¹⁰Eropirã mũa yujugu Jesucristo ya buherire gamebigu gaji buherire buhegu mũa pohro eracũ igũre game bocatĩbiricãque. Mũa ya wirigue ñajadorebiricãque. ¹¹Gaji buherire buhegu Jesucristo yare umupeobigu ñero iigu ãhrimi. Eropirã mũa igũre bocatĩri sererã ñero iidigũre itamurã iiaa. Eropirã igũre bocatĩri serẽbiricãque.

Were gojatura āhraa

¹²Baja yūhū mūare werediaqueregū ta irire paperapūgue gojabeodiabirica. Yū basi ta mūare īagū wadiaca. Mūare īagū weretamugūca mari ōaro mucubiriburire.

¹³Mū pagū mago Goāmū beyedigo igo porāpū mūare ōadorema. Iripēta āhraa.